

大乘阿毗達磨雜集論述記卷第二十六

唐京兆大慈恩寺沙門窺基撰

決擇分中得品第三

云何得決擇。

得品第三初問後答。

得品前前修行今獲果圓有尅有證故名爲得前
成就品通漏無漏曾及未曾趣未發趣三性諸法
今此宗明無漏未曾發趣善得品有二初問後答。
略說有二種。謂建立補特伽羅建立現觀。

答。初略後廣。補特伽羅雖非實有下爲廣有二。初

廣補特伽羅能證次建立現觀略有十種。下廣現觀所證後第十四卷解一切種妙智意云復次於諸現觀位證得後後勝品道時下合料簡二能證所證廣建立能證中有二。初立所由後正建立。答中有二。初標人法後廣分別。初中有二。初論本文。後釋師解。

前爲能證後是所證。

釋師解中分二。初解二所以前爲能證等是後補特伽羅者釋妨難謂持自體故名法可有所證。既無有常一我誰爲能證也。菩薩地說所學法如是

學能修學。此三名菩薩地前法品等所學法。此現觀法如是學補特伽羅能修學也。無量色等差別法者。所詮法無量也。無量差別相想法者。能詮名想法無量也。古人解云。初色蘊無量後色蘊處無量。此不順文云何稱想。又解前爲所緣文。想能緣取故。分齊相勝故也。雖有此解。不及名體總立一數取趣。或無量色等差別卽是無量色中想。唯有心想解故。都非實有。

補特伽羅雖非實有。由四種緣是故建立。謂言說易故。順世間故。離怖畏故。顯示自他具德失故。言說易

者若於無量色等差別無量差別相想法中總合建立一假有情卽呼名往來等種種言說遂不爲難。順世閒者非諸世閒唯依法想而起言說多分依有情想而起言說是故聖者爲化世閒必應同彼方便建立補特伽羅。離怖畏者世閒有情未會甚深緣起法性。若聞一切有情無我便生怖畏不受正化。顯示自他具德失者。若離假立有情差別唯說諸法染淨相者是則一切無有差別不可了知如是身中如此過失若斷未斷如是身中如此功德若證未證是故建立補特伽羅。

所由有二。初標次列。後釋。

云何建立。

建立中初問後答。

略有七種。謂病行差別故。出離差別故。住持差別故。加行差別故。果差別故。界差別故。修行差別故。

答中有三。初列七類。

病行差別復有七種。謂貪行。瞋行。癡行。慢行。尋思行。等分行。薄塵行。出離差別有三種。謂聲聞乘。獨覺乘。大乘。住持差別有三種。謂未具資糧。已具未具資糧。已具資糧。加行差別有二種。謂隨信行。隨法行。果差

別有二十七。謂信解見至身證慧解脫俱解脫預流。向預流果。一來向。一來果。不還向。不還果。阿羅漢向。阿羅漢果。極七返有家家。一閒中般涅槃。生般涅槃。無行般涅槃。有行般涅槃。上流退法阿羅漢。思法阿羅漢。護法阿羅漢。住不動阿羅漢。堪達阿羅漢。不動法阿羅漢。界差別者。謂欲界異生。有學無學。如欲界有三。色界無色界亦爾。又有欲色界菩薩。又有欲界獨覺。不可思議如來。修行差別略有五種。一勝解行菩薩。二增上意樂行菩薩。三有相行菩薩。四無相行菩薩。五無功用行菩薩。如是等補特伽羅無量差別。

次隨列顯有二。初列後結。

後別牒釋有二。初別牒七類釋。後釋預流漸頓出離。

貪行補特伽羅者。謂有猛利長時貪欲。雖於下劣可愛境界。而能發起上品貪故。起卽長時無斷絕故。如貪行者。乃至尋思行者亦爾。各隨自境。猛利長時。如理配釋。等分行補特伽羅者。謂住自性位煩惱遠離。猛劣住平等位諸煩惱故。隨境界勢力煩惱現行故。薄塵行補特伽羅者。謂住自性位微薄煩惱。如前所說。自性位煩惱相。今此煩惱望彼是微薄故。雖於增

上所緣境界而微薄性煩惱現行音所修習勝對治力所摧伏故。

別解中病行差別前標七今爲四。一貪。二例。三等分四薄塵。

貪行等如大論二十六廣釋。此中唯取勤而不利及俱句是餘二句等分薄塵中收。下復次乃說其相等分中彼論云。如彼事貪等現行若上品境上品貪等現行是前二句與境相稱亦等分收。又釋但二句卽前門收。此中唯取前二行薄塵中如大論二十六云。於上品境起微劣貪是薄塵。於中品

下品境貪專不起此文又中品起下欲豈非薄塵行。此中且據一品語非全作法語思準應知。

聲聞乘補特伽羅者謂住聲聞法性若定不定性是鈍根自求解脫發弘正願修厭離貪解脫意樂。以聲聞藏爲所緣境精進修行法隨法行得盡苦際。當知此中以種姓根願意樂境界行果差別說聲聞乘對獨覺菩薩根性說此爲鈍。若不爾卽與隨法行等利根言相違。

出離差別有三。言法隨法行者廣如上釋。一曰教名爲法行者。名隨法。隨教法而行。名法隨法行。又

滅諦名法道名隨法隨滅行故名法隨法行。又有如如是法正智名隨法云云。如上會釋。

獨覺乘補特伽羅者。謂住獨覺法性若定不定性。是中根自求解脫發弘正願修厭離貪解脫意樂及修獨證菩提意樂。卽聲聞藏爲所緣境精進修行法隨法行。或先未起順決擇分。或先已起順決擇分。或先未得果。或先已得果。出無佛世唯內思惟聖道現前。或如麟角獨住。或復獨勝部行得盡苦際。若先未起順決擇分亦不得果。如是方成麟角獨住。所餘當成獨勝部行。

論解獨覺中云。或先未起順決擇乃至先已得果。下云未起決擇分未得果。此二迴心成麟角所餘成眾出者。此中已得順決擇分與未得果何異。雋法師云。今大乘云未得決擇分迴心者。唯此成麟角。餘三句成眾出。何已次言未得果。已對句成。故此義不然。如下解。又從聲聞迴心入緣覺。從煖頂忍迴心不至世第一法位。以前三位有多刹那世第一法。唯一刹那故。不得轉時。若如毗婆娑使捷度。又如俱舍論偈曰。轉三餘。釋曰。轉聲聞三善根成異正覺。獨覺乘等不世第一法。亦一刹那不迴。

心故。此小乘義。今大乘不然。義曰。世第一法亦多。剎那。何以得知。卽此前論文云。世第一法卽此生。故非一剎那。若以此義。四位俱得迴心。又世第一法不得出觀。唯在觀中。云何得迴心。亦不得也。唯前三位。又以不定性。人各有三乘種子。若迴心已。卽獨覺種子生。獨覺果。以羅漢等迴心。亦成獨覺。故若已聲聞六十劫。修習解脫分。迴心入獨覺時。成眾出。若至獨覺解脫分等善根位等中。更四十劫。練者成鱗角。此大智度論云。已得決擇分成眾出者。約不練根入涅槃語。此中言未起決擇分及

未得果迴心成鱗角者。此中有義曰。若未起決擇至迴心者。皆成鱗角。大小乘咸然。此義決定。疑曰。若已六十劫未迴心時。修習及迴心已。更四十劫。修習可爾。若雖已六十劫。修迴心已。更不四十劫。練根。又先非六十劫人。但三生人等。迴心後復不修習。雖未起決擇分。已不多修習。故此人成何者。義曰。此人一向利根。先未修習已迴心。及未迴心時。已六十劫。修習迴心。必經獨覺位。或百劫。或四十劫。修習必成鱗角。無異文。故如決擇分六十四文解。其已入決擇分位迴心者。有二人。一已經六

十劫修習及未修習迴心已更四十劫及百劫練根此人定成鱗角。故論云稱未得果者有成鱗角。二經六十劫已迴心及未六十劫已迴心迴心已不經四十劫乃至百劫修習者此人成眾出。故論云已起順決擇分者成獨勝部。故論云有已起順決擇分成眾出未得果者成鱗角。有此二文不同。非餘三果向迴心成鱗角爲已得果故。其迴向時三乘各於何位等者。大義曰若二乘人迴心向大者從初發心乃至得二乘無學已來皆得其有成果不同。如前釋。若大乘獨覺退等者。至下退中釋。

又其迴心時至所迴心取果處何位。釋曰大乘並至初行位。其有迴心取獨覺者以緣境位行與聲聞相似。故隨何位解脫分。迴心卽次第至獨覺此位。又還至獨覺初行位。以根性異故不可超位。若已得決擇分善及果已去者皆隨次第至獨覺此位。問其取獨覺果時須取那舍果後方取獨覺果。以非想地非有漏心所厭故。廣如前釋。

大乘補特伽羅者謂住菩薩法性若定不定性是利根爲求解脫一切有情發弘正願修無住處涅槃意樂以菩薩藏爲所緣境。精進修行法隨法行成熟有

情修淨佛土。得受大記。證成無上正等菩提。得受大記者。謂住第八菩薩地。證得無生法忍故。

大乘根性人中。言淨佛土。受大記者。謂住第八地。得無生忍故。佛地論謂初地得無生忍。智度論有二無生忍。一初地。同佛地論。二八地。同此文。以變易分段不同故說八地。以證理故。住無住處故說初地。又無漏等相續故說八地。得無漏故說初地。問。修淨佛土類所受記。有種種。或地前受。但總當成佛。未受城邑國土門徒父子等大別記。或八地受別記。乃至第一弟子名某甲等。方名大記。勘問。

顯揚第八有六記。資糧論有五同顯揚五唯無有時限。一卽前四故。首楞嚴經亦說五類。

任持中前標有三。今分爲二。初解脫決擇各三。後如是下料簡。

未具資糧補特伽羅者。謂緣諦增上法爲境發起煖品。清信勝解成就煖品。順解脫分未定生時。已具未具資糧補特伽羅者。謂緣諦增上法爲境發起中品。清信勝解成就中品。順解脫分已定生時。已具資糧補特伽羅者。謂緣諦增上法爲境發起上品。清信勝解成就上品。順解脫分卽此生時。又未具資糧者。謂

緣諦增上法爲境。於諸諦中成就下品諦察法忍。成就下品順決擇分。未定生時。已具未具資糧者。謂緣諦增上法爲境。於諸諦中成就中品諦察法忍。成就中品順決擇分。已定生時。已具資糧者。謂緣諦增上法爲境。於諸諦中成就上品諦察法忍。成就上品順決擇分。卽此生時。

初分爲二。

如是三種補特伽羅。由成就順解脫分。順決擇分。各三品。故約能引生順決擇分。及諦現觀。如其次第。未定。已定。卽此生時。

料簡中有二。初合料簡二位。後別解二位。合解中有四。初解二位各三之相。

於諦增上法清信勝解相。是順解脫分。卽於此法諦察法忍相。是順決擇分。如其次第。信增上。故慧增上。故。

次解二位差別之相。

此中三品順決擇分者。謂除世第一法。由世第一法性。唯一剎那。必不相續。卽此生時。定入現觀。非前位故。

次解決擇三品之位。

未具等三種解脫分及三種決擇分中除鄰近決擇分一剎那解脫分及世第一法外皆有三位。且如一煖已定生時或即此生時入道。或復有忍未定生不即此生入見道。雖位在後。入道時疾。雖位在前。入道時後。以此理故。不可如文便謂煖等爲初位。乃至忍即爲後位。一位中有三未具等人。故其第一法以論云。即此生故。便謂多剎那。雖多剎那。仍是一觀相續。又正義解。即此世第一法。生起已定。入見諦。非離此一生也。故唯一剎那。

從下中品順解脫分順決擇分有可退義。此唯退現行非退習氣。已依涅槃先起善根者。不復新起。故依此下品順解脫分善根。薄伽梵說。若有具世間增上品正見。雖經歷千生而不墮三惡趣。

後解二位退不退相。

就退文中言。中下解脫分決擇分可退。唯除決擇分中世第一法者。以煖等別有四位。收前三各三品一唯一品。以此故。除餘增上忍及解脫分中上品者。以決定并前故。非下中品得有決定。退中言中下雖退。唯退現行不退種子者。此以現行不成。就義說。非失種子。猶如七支戒不新生名捨非其

舊種。此中下位雖退。仍不新造惡業。然墮惡道。故說佛言願等。此中退者。便不決定。二乘位中說非。向大乘若決定者。定得所趣。非上位退。以此義故。於煖等位。有退不退。如上未具等三人。唯知緣覺。準斯可解。又有解。如疏云。忍不退入惡趣。決定故。今言增上意樂。非必一切下品解脫分皆退故。若大乘退者。依優婆塞戒經。舍利弗。已曾八萬劫修習。至十住第七心退。菩薩本業瓔珞經。四十劫退。智度論。六十劫退。其實皆亦至第七心說劫數不同。故有多少。勘問若純業說六十劫。若雜業說八

萬等。

又有四種順解脫分。一者依憑順解脫分。二者勝解順解脫分。三者愛樂順解脫分。四者趣證順解脫分。從善法欲。乃至爲求解脫。所有善根。皆名依憑順解脫分。於彼相應教法。所有勝解。俱行善根。是名勝解順解脫分。緣解脫境。作意相續。清淨喜俱。所有善根。是名愛樂順解脫分。卽於此生。決定發起。順決擇分。所有善根。是名趣證順解脫分。

順解脫分中。從善法欲。卽解脫分體。以愛菩提等。故名善法欲。其當未具等三人者。以義準思。初二

未具第三第四依下二次第問文。大義曰。五停心觀。總別念心。下品決擇分。方便是決擇分。收今以煖等四善根本說決擇分。其實五停心觀等亦是。非解脫分耶。勘中邊說。

復有六種順決擇分。謂隨順順決擇分。勝進順決擇分。通達順決擇分。餘轉順決擇分。一生順決擇分。一座順決擇分。若最初所起緣諦境行下品善根。是名隨順順決擇分。卽此善根轉成中品。是名勝進順決擇分。望前下品。是增勝故。卽此善根增至上品。於此生中決定。堪能通達諦理。是名通達順決擇分。又卽

此位中不定種姓者。爲迴向最勝菩提。及諸獨覺。爲求無師自證菩提。轉趣餘生。是名餘轉順決擇分。若於此生定能通達。是名一生順決擇分。若於此座定能通達。是名一座順決擇分。

六決擇分前三隨自乘。卽未具等三隨次配屬。其第四卽此位中決定不定種姓者。爲迴向最勝菩提。提及諸獨覺轉趣餘生。是名餘轉順決擇分。法師云。卽用聲聞煖頂忍三善根迴求獨覺。如前可知。卽聲聞煖頂迴求菩提。以聲聞忍得生。非擇滅故。不求菩提。法師雖別迴心獨覺。與大乘別。仍未得

法師意問獨覺迴求菩提準可知此中論言迴心者前三句皆迴心若前三句皆迴心是則未具資糧等三中云何前言已具資糧決定不退彼前言不得退何論迴心此言三句皆得迴心非已具人有退也若迴心向大等如此若獨覺人如前退中釋其世第一法唯退不得迴心一觀一剎那故第三句亦名一生第五句亦名一生此何異也法師云第三轉下中根得上根通達現觀據轉根人語第五據不轉根人語云何此中言轉不轉豈有在決擇分已從下中而轉上品乃言不轉本是上品

若不轉根本是上品應取未定生等方至此第五一生若從未定生方至一生者云何言不轉以此義故更作異思第三句謂從發心未迴心已來望自乘語第五既迴心隨所迴心見道更語故有差別既言轉根前三句是轉根未必是未具等三人未具等但轉生非轉根以此義故亦隨前解第六一句通定不定故判云前三句通定不定性人隨望自乘語第四五句唯迴心已人語第六一句亦通二種。

隨信行補特伽羅者謂資糧已具性是鈍根隨順他

教修諦現觀隨法行補特伽羅者謂資糧已具性是利根自然隨順諦增上法修諦現觀。

隨信法行中論云謂資糧已具性是鈍利根等者大論五十八相違如前第九抄二十六唯二復次釋文雖多不及此解法師云既言資糧已具取一生解脫分善根人定入決擇分者既不定久但言資糧已具何廢得取一生一座解脫分人又唯取決擇分善根資糧已具一生一座定入見道者是則煖頂等皆是隨信法行以皆具生等故大乘義曰唯取決擇分善根一生者以鄰近見道殊勝故。

一座者即向故非此中收隨信法行從師不從師異如二十六二復次廣釋問何故此二人不入果差別義曰爲未至果故問曰若爾者前三向人亦未至果亦應不入果差別中義曰言前三向雖未至果已近聖道已得果故此非切難又問曰隨信法行是決擇分位不入果中收初向取一座決擇分應非是果攝義曰隨信法行取一生非即一觀證果故故非果差別中收初向雖取四善根一觀得果果中攝無違更難思之。

信解補特伽羅者謂隨信行已至果位見至補特伽

羅者謂隨法行已至果位。

二十七聖果差別中分六。初二依加行差別。次一依定差別。謂得八定故。次二依障差別。斷定障異故。次八依道差別。次八依生差別。後六依退不退差別。此依瑜伽二十六說。彼初雖解二十七。然自下解後六位中。以隨信法行為加行別。不說信解見得。今解即彼二人至果名信解等。故亦可名加行差別。彼論解退不退名時解脫。不時解脫。此開為六。亦復何爽。然六無學。六人各一。此說住名。約不練根故。五十七說。五人練根。不動亦練。望自性。

非他性即是。如第六不動。望自果不練。望獨覺菩薩。即練菩薩。亦爾。以望自果。即練。如此第十四末說。

二十七賢聖總有六類。由因根性得果差別立一。謂信解見得。由滅定差別立一。身證。由道果差別立八。四向四果。由生差別立八。謂極七返家家。一聞。中般。生般。無行般。有行般。上流。由退不退立六。謂退思等。退有自類。故開為五。由障立二。謂慧解脫。俱解脫。煩惱障及定障。二離不同故。信解見至。即前利鈍人已至於果。隨四果皆是。如

二十六云。卽隨信法行。信解因他教等。見至自緣法教。觸證沙門果名。見至解。故知取四果。

身證補特伽羅者。謂諸有學。已具證得八解脫定。卽不還果。說名身證。由身證得八解脫定。具足住故。八解脫者。謂有色觀諸色等。後當廣說。

身證中言具證八解脫。方名身證。若不具得八解脫。唯得一二。乃至六七。不名身證。如大論二十六云。有二復次。如下復次云。謂身證人。於八解脫身。作證具足住。而未獲得諸漏永盡。乃至列八解脫名。已能順逆入出自在。乃名身證。故知不具得不

名身證。準前第九論云。四句中。斷三禪下惑。伏以上惑。方得滅盡定。此那舍人。方名身證。若雖斷三四禪。乃至無所有處。惑不得滅定。及斷初二禪。惑不能伏。惑得滅定者。不名身證。問此人爲作餘那舍。謂有行等人。不答曰。不作。或作樂定上流。生於非想。而般涅槃。若伏惑得定。退滅定時。亦生第四禪。廣如前四句中釋。仍亦生無色。不作有行等。色界人流於色界。必得滅定故。又若不定性人。卽於欲界而迴心故。問何故不作生色界。已而般涅槃。要生無色。義曰。已於欲界得滅定故。至色界已。方

要修滅定。若非退人。但爲無色樂定。那舍。此義爲眞廣如前說。

慧解脫補特伽羅者。謂已盡諸漏。而未具證入解脫定。唯究竟斷慧所對治煩惱障故。俱分解脫補特伽羅者。謂已斷諸漏。及具證入解脫定。由煩惱障分及定障分俱得解脫故。

慧解脫俱解脫。具證入解脫名俱解脫。唯得一二解脫及全不得者。非俱解脫。是慧解脫。何以得知。要具證八方名爲俱。及不具證名慧解脫。釋此二人中論有具證字故。慧解脫中唯言究竟斷慧障。

故知雖得一二乃至七解脫。斷定障不究竟斷。故非是俱人。如大論二十六兩復次釋。

預流果向補特伽羅者。謂住順決擇分位。及住見道十五心剎那位。此中意說。始從一座順決擇分。乃至未得初果。皆名預流果向。

預流向中取前云。順決擇分中第六一座。以此觀入見諦。非前位故。言十五心者。此隨順相論。以下準此義知。又卽隨信法行人得一座。及定不定性一座者。皆是若迴心已一座。不是初向。卽煖等四善根。皆是初向。并有一座故。若在煖頂位。是信法。

行後得一座忍等煖頂二位卽非初向。除此已外卽初向收。又初向有二種。一超越。二次第。次第可知。超越者謂先伏五品後入見諦。未至道損亦初向。若次第伏斷五品是第二向。餘準此作之。易解預流果。補特伽羅者謂住見道第十六心剎那位。卽此見道亦名入正性決定。亦名於法現觀。問誰於見道最後心位得初果耶。答若於欲界未離欲者後入正性決定得預流果。謂次第者雖少分離欲亦名未離欲。彼後入正性決定至第十六心位得預流果。預流果中論云未離欲者入正性決定得預流果。

雖少分離欲亦名未離欲。謂在凡位以世間道伏欲界五品等煩惱入見道。依此文但總言不分別。且以一道理謂六行時唯伏五品現入見道方斷種子。卽取此論文爲證。問曰三界見惑障初果入見道時可斷種五品修惑不障於初果。何故說入見斷種。釋曰先以世間道伏五品現行已種子力劣。雖非障果入見道亦斷。又斷此乃知我共傳法師引顯揚第十九云先以世間道伏無所有處以下惑入見道。唯斷欲界九品種初禪以上不斷。以不障第三果故。依此道理準彼初果亦不斷。彼五

品修種以不障初果故。如第三果。此文屢尋未見。問曰。上惑下智斷。上智斷下惑。修惑既細。如何以見道下智斷。修道下惑耶。法師三說。一說卽與見道惑同時斷。但爲一見無閒解脫。如次初果取第四果。以下智斷。非想第九惑不下惑。故無過。是利智故。二說如十六行至道法忍方斷八。修惑細故。三十六心斷見惑。訖不出觀起修道智斷五品等惑。其修惑修道斷雖一惑一無閒道。今隨見道五品等惑。但爲一無閒斷。今雖三說。意取最初。如前伏惑初果超越第二三果。應如理知其先伏惑得

初果人。若但斷三四品以下入見道。經生是家家。若但斷五品等修。唯有餘四品惑。云何潤生於欲界。經生亦復是何人。釋曰。此人旣斷五品第六品惑。微劣豈不次第初果斷五品時。必斷第六。以心增。故此惑勢劣。故今伏惑初果人。雖先斷五品。先智勢用強。故此品惑勢劣。故必定須斷第六品惑。方可經生等。無有卽住斷第五品惑而經生者。若爾。卽以七八品惑潤生。是不還果及一閒等。仍疑未決定。問以此妨。故先以世閒道伏惑入見道。不斷經時。義無妨。故若爾。云何潤生。未離欲聖者以

現行潤今此人已伏現行唯有種子第六品以去現行得有若以前五品種子潤生卽與未離欲聖者論文相違若用第六品現行種子潤生前五品既有種子不斷潤生之力云何乃成一來人不用前五種子潤且義曰還用前五種子潤若爾云何釋未離欲聖者文述曰言未離欲聖者等論文據次第初果不伏惑人語何妨伏惑未離欲聖者以種子潤如論云凡夫以現行種潤無想天後生下界時無心不廢唯以種子潤雖欲界聖者以現行潤何廢別有唯以種子潤問又且如初果人更未

用無漏修道唯以欣上厭下乃至得初禪以上此人命終云何潤生欲種未斷不可卽生上界以得上定復不退故下界復須以現行潤旣無現行應無下界生等義曰如前熏禪人準釋臨命終時必定須用無漏道斷修惑生上界不然須退失上定又必無未用無漏道而唯用有漏道欲界命終者此據不退人若退人欲界生死無妨若唯退三四禪等不退初二禪卽命終亦無此人亦必用無漏道不然卽并退若退乃至唯有伏欲界一二乃至七八品等如前不斷種。

若倍離欲者後入正性決定得一來果。謂先用世間道已斷欲界修道所斷六品煩惱名倍離欲。彼後入正性決定至第十六心位得一來果。若已離欲者後入正性決定得不還果。謂先用世俗道已斷欲界修道所斷九品煩惱名已離欲。彼後入正性決定至第十六心位得不還果。問若已永斷見道所斷一切煩惱得預流果。何故但言永斷三結得預流果耶。答。最勝所攝故。由此三種障解脫得最爲殊勝。所以者何。於解脫是不發趣。因故雖已發趣復爲邪出離。因故及不正出離。因故。由薩迦耶見執五取蘊爲我。我所

深生愛樂故。於大苦聚不生厭背。於勝解脫無發趣心。或有有情雖已發趣解脫。然由戒禁取及疑僻執邪道疑正道故。便邪出離。及不正出離。又此三結是迷所知境。因故迷見。因故迷對治。因故所以者何。由薩迦耶見迷所知境。於大苦聚虛妄增益我。我所相。故由戒禁取迷能知見。於顛倒見。謂爲清淨出離。因故由疑迷正對治。於三寶所不決定故。

初果得一來果。名倍離欲者。欲界修惑總有九品。下三未斷。以下三望六。是倍離欲。又以前三望六。是倍可知。初果斷三結。中言我。我所者。此見道我。

見道我所乃至或二十句六十五句可知。修道末那中我見如前文釋。三結如此論有二復次。如小義以見斷四諦故。言我見收苦下。一切我見苦根本故。言戒取收道下。一切以道下戒取爲道故。言疑收四諦下。及集滅一切使故。世間因出世果皆疑故。以增用故。故說三結。又隨因故。如身見邊見。隨生說身見邊見。隨戒取者見取隨疑邪見。隨故說三。合因。因生三有六。餘四鈍使。因此三而生。故但說三結。永斷唯次第。初果增斷煩惱人。非先伏惑人。廣如前說。

一來果向補特伽羅者。謂於修道中已斷欲界五品煩惱。安住彼道。所以者何。由見道後已斷欲界乃至中中品煩惱。及住彼斷道故。一來果補特伽羅者。謂於修道中已斷欲界第六品煩惱。安住彼道。所以者何。由已永斷中煖品煩惱。斷道究竟。建立此故。若經生成家家。不經生卽此向。二體別故。又此向未經生。是向若潤。是向進。皆得一來果。潤生不潤。取斷六惑爲一來故。

不還果向補特伽羅者。謂於修道中已斷欲界第七第八品煩惱。安住彼道。所以者何。由一來果後已斷

欲界煖上煖中品煩惱及住彼斷道建立此故。

不還向如一來向準知。

不還果補特伽羅者謂於修道中已斷欲界第九品煩惱安住彼道所以者何由彼永斷欲界煖品煩惱斷道究竟建立此故問若已永斷一切見道所斷煩惱及已永斷欲界修道所斷一切煩惱得不還果何故但言永斷五順下分結得不還果耶答最勝所攝故云何最勝由此五結能爲下趣下界勝因故名最勝所以者何下趣者謂那落迦旁生餓鬼下界者謂欲界以薩迦耶見戒禁取疑爲最勝因令諸有情

不越下趣故以貪欲瞋恚爲最勝因令諸有情不越下界故。

不還果中其超越人如前說不伏斷上界惑等亦如前說身見戒取疑下三趣因雖見道斷以此處斷苦集故說人天由貪瞋爲因故說不越下界雖見道時亦斷此修道中從究竟盡故言三結收見惑一切盡言貪瞋收修惑一切盡以二處斷苦集那含是一處集故又超越人見修俱時斷故說或其次第人應不言斷五下分結以此義故如前說勝如顯揚第十九說伏惑等未見文此第三果下

界不經生成有行等那舍以欲界未經生故。先以會潤生聖厭生苦卽不生上界。如下廣釋。又不斷第七中惑及第六識中我見。如別章及第一卷抄。阿羅漢果向補特伽羅者謂已永斷有頂八品煩惱。安住彼道。

第四向人亦次第斷惑者。非伏惑入見道者。如前說。成上流等。隨所斷地則不受生。卽第三果帶果行向等。如第二第三向等準釋。如伏惑入見諦不斷種。卽無帶果行向人。唯有次第向人。若超越斷惑人。作帶果行向人故。

阿羅漢果補特伽羅者謂已永斷有頂第九品煩惱。安住彼究竟道。問若阿羅漢永斷三界一切煩惱。何故但言永斷一切五順上分結。得阿羅漢果耶。答。最勝所攝故。云何最勝。由此五結是取上分因。及不捨上分因。故名最勝。所以者何。由色無色愛取欲界上色無色界生故。由掉慢無明不捨此上生故。以愛慢疑上靜慮者爲彼所惱故。

第四果中五上分結。若二處斷。苦集卽說一切結盡。不爾。唯說上分結。二界愛爲二分。無明掉慢爲五。以增勝故。唯取爾數。如論文言疑者。以疑說無

明於疑時無明增故。或法執疑卽疑。机爲人是無明體。非疑使也。如前第九卷四無記根中說。此果及前三果向等。悉皆通隨信行法行等。此第四果離後六種無學及俱慧解脫人外。無體廣釋如別處。其斷煩惱生上界。廣如第二卷滅定中論。

極七返有補特伽羅者。謂卽預流於人天生往來雜受。極至七返得盡苦際。

極七返中。大乘無別文。廣如毗婆沙。一名妨問曰。何故名七生。以極生不過七故。二應多妨問曰。何故作是說。述曰。以人天中生有并中有合有二十

八。以本有等而言。皆不過七生。如三轉十二行法輪。一諦有十二行。合四十八行。以一諦各十二。不過十二故。但說十二行輪。此亦如是。三應至八妨問曰。何故但七不至八。耶答。增減者皆有疑。不以疑故。述於法以業力故。唯受七有以聖道力故。不至第八。若七步虵以四大力得七步。毒力故不至八。若又至八者。便是佛法外。在凡夫身。必受八生等業。今得非擇滅。唯有七生在。如世人中七世相。是眷屬。若過七生者。以非佛眷屬於增上。忍除七生外。一切生得非擇滅。若不爾。一一業受無量生。

故此據決定性人爲論。或有不滿七乃至天二生人。一生人二生天一生。說極爲論。故有七生。四若數得道生。應有二十九生。不名七生妨。以七生合有二十八。故違施設論。彼云須陀洹受二十八。有故。若以此義。卽不說得道生人中得道。天上涅槃。天中得道。翻入卽是五七生中。若起聖道。應有入涅槃妨。七生中得起聖道。以業力故。不入涅槃。此聖道非斷惑。但遊觀。故不入涅槃。六若有佛在世。七生滿已成阿羅漢。應出家相。若無佛世。應無出家相。妨以羅漢必受出家相。故若無佛世。要當於

餘法中出家方得果。有義在家亦得果。得果已不住家。於餘法中出家受法服。有五百辟支。本是聲聞。於彼出家亦得。若無如前說。如俱舍論。若佛不出。在家得羅漢果。已必不住家。法爾必得比丘威儀。又有說。或作別道人威儀。七九品業。其潤生建立諸果。過去何潤。生法師云。古有二說。依法師云。景法師。依法師說。以十四生爲論。上三品類。其潤四生。中三品類。其潤二生。下三品類。其潤一生。上品獨能潤十四生。中四生。上中上下。其潤四生。中上品獨潤二生。雖復其潤。皆有潤四生之義。故

云類共潤四故雖斷上中品時上下品獨有二生
自力羸上第獨借力中中中下其潤二生如上三
品釋下上品獨潤一生下中下下其潤一。義曰若
斷三四品餘二生三生明知斷上三品時有三生
在若斷中上品時餘二生在故知上三品潤四生
斷時四生無但有三生在若斷中上時餘二生在
故知能潤二生若樂慧不還等準應知。妨曰上中
上下既其潤四生何故斷上中時上下品仍潤二
生既獨能潤二生何故言其如前解並以強弱道
之強獨潤弱其潤又上中上下中上三品潤生既

等云何名三品。休師云法師云念師說以七生說
上上潤二生上中上下其各潤一生。雖斷上中時上
下仍潤一生。中三品本無位故一切法但有上下
故中三品或分屬上或分屬下。中上品屬上品故
猶潤一生。中中中下其潤一生以屬下故。羸者同
上三品細者同下三品。下三品共潤一大生。潤既
爾損亦爾。若以中品無別位屬上下者。其上中上
下二品有別位。何故相似潤一生。八若唯有七生
一來應無迴向大不定性人。妨述言七返者有二
種。一決定性人如前說。二不定性以得初果時未

迴心合是七生人已依生故。雖七生已迴心以從因說亦是七生者。若不定性迴心向大。如佛地論第二卷或更不經生則受變易報云何作。或得第四禪地無漏邊定潤變易生故。或九品業前忍時雖得非擇滅以大乘非擇滅法更得受生故。更經多生受分段變易報方得佛果。廣如佛地論第二卷同是七生必潤不潤生者非。若預流果經生者是不潤生者非。

家家補特伽羅者。謂卽預流。或於天上。或於人中。從家至家得盡苦際。所以者何。卽預流果進至一來果。

向。或於天上。或於人中。決定往來。極受二有。方般涅槃故。

家家中。大乘無文。斷一三四品。俱家家相。若五必六。若六卽一來。故論云。極受二有。未由煩惱品。故生。如極七返。有九品。並在。或受一二生。豈由感品潤也。又斷七八時。猶有一生。故亦可一來。無有斷五必斷六理。如超越果。有斷五入聖者。故答曰。一閒唯出欲界。故無斷五品。忍不至六。今解有之。故亦無妨。唯斷二三品潤生者。是其潤生。如前說。二不說斷五及初二品潤生妨。應在第三述曰。若斷一

二品卽潤生者今謂無此人以論文不別立賢聖故如大智度論斷一二品潤生者名中間須陀洹今大乘不立以無此人故彼隨順文豈以不立卽無此人耶如無色那含難述曰無色卽此中樂定上流是何故爲例復是難不可以一例多人然若斷五品必增斷第六第六法羸劣故不能作留難趣果心猛非餘三四品等爲例以不趣果故彼惑作留難故惑體強故三云何家家應在第二家家有二種卽如大論二十六云有二種一天一人卽如下引一人中家家謂人中生或一天下二天下三天

下生或一天下一家二家三家生二天中亦爾或生一天二天三天或生一天一家二家三家等得聖四家家因緣具三緣故方名家家闕一不可故雜心云若斷三四種一斷結成就彼對治二以根謂無漏根餘二生三生三以業旣爲潤生不同斷二品五生在斷三品二生在廣如前說五聖人造業不義曰不造總報造別報如說世尊說彌勒成佛時事會中有未離欲有學人聞是說已皆共立願使我聞見是好妙事已方般涅槃此云何通答曰此須臾時於所須物無所乏少不爲苦痛所逼

而有所願若爲苦痛所逼於一切生處更無願求。我若能如鳥飛於空者願於今日而般涅槃若作是說聖人不作欲界受身造業者彼作是說彼家若二生三生造業者於凡夫時若斷三種四種結或凡夫時斷謂先世閒或聖人時斷謂因得無漏故。復有說者聖人作欲界受身造業者家家須陀洹造二生若三生必受總業或凡夫時造或聖人時造斷三種若四種結或凡夫時斷或聖人時斷今大乘凡夫時用六行非永斷心伏故在忍位亦可爾設有此義無妨造業唯凡夫時非聖人時。

六初二三果若經生生上界者不厭生死妨故。義曰。一閒種子謂此閒得正決定此閒畢竟謂一閒漏盡乃受七有家家一來果一閒現般涅槃如此聖人不生色無色界以聖道舊住身品厭生處故。聖人易世必有三事。一不退。二不練根。三不生色無色界。七釋妨難謂合有現般。謂此身得果此身般涅槃論今不立理實有之。今義思不越四果。卽前四向果中收。所以不立。若不以此義則別合立之。此人果上不經生非七生。向中不受生非家家。更不經生得果非不定。故合立之。又合立不定般。

於後果後向中經生得涅槃者此名不定。初果人住果經生雖不滿七。及雖未受生決定作七生。此人七生所攝。且如上流住欲界梵天。雖未流者亦名上流。決定上流。故若家家因緣具決。向中受生。雖未受生亦名家家。前三不攝於後。向中經生已去身第三果等者。今以義準得皆名不定。文雖不說理必有之。以此推尋。二皆全有。雖爾今立二十七賢聖不立有此二人。如不定般人。謂約第二向斷一二品及先斷五品人。見諦經生是。今大乘決定無有此人。如前釋。若有何故不立。妨何以唯三

家家等。以義準家家相。以三天下生故。廣如前述。家家七返等。中古有二解。一空法師等爲十四生。二餘德爲七生。上上損益二生。上中上下各一。中上損益一。中中中下共損益一。下三品共一生。今大乘或可不然。一切全界煩惱皆潤生故。互皆相資。但由道漸上時。惑漸斷盡。生自然少。非品定損益。故有斷一品二品五品家家於理無爽。瑜伽但言天人家。不同小乘說斷惑品三緣立故。一以業二以道。三以斷結。故三四品成就。彼對治。餘二生三生卽三緣故。

一聞補特伽羅者。謂卽一來。或於天上。唯受一有。得盡苦際。所以者何。卽一來果進至不還果向。或於天上。唯受一有。得般涅槃故。唯有一隙容此一生。故名一聞。

一聞人如大論二十六卷說。此卽二種。一斷七品。二斷八品。卽大論云。謂卽一來果行不還果向。已能永斷欲界上品中品。唯餘下品。唯更受一欲界。天有卽於彼處而般涅槃。問曰。若斷七品。餘有二。種子在。云何名一聞。義曰。不以一種在名一聞。以一有聞在名一聞。有說唯斷七品結名一聞。非斷

第八名一聞。以斷第八品時。必能離第九品故。如斷第五品。必增斷第六。不能障礙留難。離欲結故。復有說。斷五品。增斷六品。以不能障礙留難。非不斷八品。成一種子。問曰。第九種結性亦羸劣。不能留難。何故有斷八不增斷第九品名一種子。答曰。若斷五品時。未離欲界結盡。故猶可受生。不能留難。非斷第八。增斷第九。以離欲結盡。故能爲留難。以於下界不受生故。有三時煩惱業能極障難。一謂頂向忍時。諸惡趣決定業能爲障礙。若起忍時。此業於何處受生。二聖人離欲界時。欲界決定業

能爲障礙。若離欲者。此業於誰身受報耶。三得無學時決定應受。未來有業能爲障礙。若得羅漢。此業於誰受報也。以此義故。有斷八結一閒。必無斷第五家家者。二明受一種受者。故論云。人中子者。人中一生分。天中子者。天中一生分。此據二處皆得果。向入涅槃。如此論及大論二十六云。唯云於天中得涅槃。此據人中得果也。於天入涅槃。非約天中得果語。若論大乘。唯於天上得涅槃。人中得果者。豈無天中得果人也。若有卽於人中入涅槃。一種子業爲凡夫時造爲聖人造。有說唯凡夫時

造聖人時不造。斷七八結時。或凡夫時先斷。或聖人時斷。或說聖人時造。亦凡夫時亦造。一種子一生必受報業。或凡夫時斷。或聖人時斷。如前說。今大乘唯凡夫非聖人。以厭生故。廣如別處釋。四聖人欲界經生者。必不生上界。此一閒欲界潤生。故不生上界前。一往來人。若次第斷結得果。不經生住斷六結位後。能增斷欲結生上界者。住斷六結位中。亦名一來果。或若次第若超越斷六結。必經一生者。是一來果。若欲界有一業在定經一生。可名一來。雖住斷位後。增斷欲結。欲界不經生。生上

界者云何名一來上界多生故。義曰。豈以後能增斷欲界結生上界者住斷六位非一來果耶。如不還果人除現般涅槃者生上界已者更不下生名不還。云何住斷六位後能增斷下結生上界而名一來耶。義曰。此住斷六位下界經生不上生者別名一來。但以住斷六位雖後能增斷生上界在此位故從名一來。更難無極思之。

中般涅槃補特伽羅者。謂生結已斷起結未斷。或有纔起即便聖道現前得盡苦際。或中有起已爲趣生有纔起思惟即便聖道現前得盡苦際。或思惟已

發趣生有未到生有即便聖道現前得盡苦際。此中顯示三種中般。由煩惱力往趣生處令生有相續。此煩惱已盡。唯由隨眠力令命終後諸蘊續起。此隨眠餘猶未盡。或中有纔起由串習力聖道現前斷餘隨眠。即於此位入般涅槃。或中有起已爲往生有纔發思惟聖道現前斷餘隨眠入般涅槃。或思惟已往生有處未得生有聖道現前斷餘隨眠入般涅槃。如是三種望生有處未發纔發已遠去位差別。建立隨順七善丈夫趣經。

問。何故中般無現纏。中有未潤心受故。不受當果

生正知入胎。卽中般中言生結者。如下文謂現有當果生。謂經生不還盡。此爲聖者遠盡獨覺之染。正知亦爾。此煩惱已斷者。是以聖人生上界中有潤生。有時以現行潤。此惑已斷起結者。如下文唯由隨眠力中有續起者。是以聖人生上界者。死有潤中。有時以種子潤。此種子未斷。卽第三果人欲界不經生者。生色界。此中有卽色界繫也。勘俱舍論。問曰。何故上界一地。死生上界一地。時無中般。唯下界死生上時。有中般者。必初捨欲界身住色界中有者。以厭三苦心極利。及厭生上界長壽。故

能得涅槃。捨色界身。生色界者。無苦可厭。非初捨下界身故。是故無中般。言有苦可厭者。此中有是色界繫。初已起厭。故名可厭。非正得般時。有苦可厭。捨色界時。亦雖厭苦。非如中有深起厭意。若以捨欲界身。有苦可厭。卽得中般者。須斯二果。應有中般。以第三果久修聖道。聖道成就。惑品微劣。唯有斷無記煩惱。故所以有中般。非初二果久修聖道。雖有苦可厭。無劣惑易除。得有中般。故俱舍論有四復次釋。由道未成就。故由思不現前。故隨眠不劣。品故。欲界難出離。故毗婆沙師說如此。又所

應作事甚多。一應滅惡無記性煩惱。二應得第二第三沙門果。三應出離三界。若在中有不能成就此事。若以無記煩惱易斷。故立中般者。第三果色界死。有應立中般。無不善等厭故。亦非初捨欲身故。過如前。又若以無不善可厭。不得中般者。未審彼金剛心。無不善可厭。故述曰。彼生身起聖道力。強先來不妨彼樂。中有起聖道。今乃然也。以非初捨欲界身故。不同金剛心生有身強。故問曰。生有力強而得有起道。下界中有起聖道。不得生有起無漏。以中有起故。義曰。不然。豈以生有起道。雖別

得中有如下界。豈由中有起聖道。生有得起耶。不然。六行伏惑等。中有不得耶。答曰。雖無支解。亦不得。問曰。何故不得。以中心劣故。所以不得。問曰。聖道中有由起。何故不爲六行。述曰。以今有曾起無漏。所以中有起聖道。問曰。如已伏欲界欲生。初禪初禪中有起。在於中有中。何故不起六行。義曰。諸法師云。但以心劣解妨難。無窮盡。義曰。以中般要須初捨欲界身故。所以中有別有中般者。不以初捨解得六行。是故中有無六行者。一切中有無作六行者。中有起聖道少。故不別其生結。如小乘

畢竟非擇滅更不復生。今大乘不定若決定性生結乃畢竟不生。其不定性人生結後必定生。問曰：中般人何時迴心而生結還生。義曰：亦如義當中般道惑合然。其捨命時大乘根熟迴心發願生結還生。三大僧祇受生死報。又說纔至中有將般涅槃善緣現前大乘根熟迴心入大生結還生。問曰：中有之身何故得有現前善緣。大義曰：且如經說佛處中有二十年間教化有情。以此準之中有之中亦得迴心。若如前解中有卽不迴心。雖佛處中有教化諸眾生不可卽有中有迴心者。以諸生結

畢竟非擇滅。故若作後解任取詳之。旣無別文理難一準。其迴心受分段變易身者。如變易中解如佛地第二卷勘如下上流中總釋。若許生結更起無色聖者亦有下生。舊非擇滅法亦更起。故不爾彼無化故。化無色生者非大乘義。思之又言生結起結者非但唯愛取潤生時說生起結。且義釋曰：亦可中有生有一業所招。此業功能招中有者有感生有者無。但以生有中有二殊說生結爲煩惱。說起結爲隨眠。故下論文煩惱已斷謂生結隨眠未斷。謂起結或取潤愛。義釋如前。或業潤同亦無

乖妨。任意思準。此三人者。如大論二十六云。有三
喻。如小札火。微星纔舉。即便謝滅。此喻初人。如鐵
搏鋌。炎熾赫然。鎚鍛星流。未下便滅。即喻第二。如
彼熟鐵。鎚鍛星流。下未至地。即便謝滅。此喻第三。
如雜心中。亦有此義。以論云。七善丈夫。趣經者。謂
七丈夫。如雜心云。即色界五人。中般分三人。及無
行等四。合名七種。

大乘阿毗達磨雜集論述記卷第二十六